

Bela arjonta per Manuel y Alyssa

I doi jèuni vènc la prima garejeda dla sajón

L ie urmei n ann che on la situazion scialdi ria pervia dl Covid-19, che à tucà coche truep d'autri ciamps nce l sport. Mpo iel stat mesun, nce sce cun duc i cuntroi y cun tests uni ena, de fé da mei dl ann passà inant alenamënc reguleres. Ntèur caranta èura al'ena se alenea Manuel Piazza de Urtijèi deberieda cun Alyssa C. Montan de Trënt tl jadiné a pères. Sce la ie jita fata cun i alenamënc ne pòssen nia di l medemo dla garejedes.

I doi jèuni se ova qualificà per doi garejedes dl ISU Junior Grand Prix tl scumenciamënt dla sajón, ma tramedoi garejedes ie unides scancelede pervia dl Covid. Desdit àn nce i Campiunac dl Mond junior tla China, i Campiunac talians che fova normalmënter a mez dezëmber ie unic sburdlei nchin a mez merz de chëst ann.

Per fertuna se à la federazion talian lascia tumé ite velch de nuef, l se trata dl zircuit »Gran Premio Italia«, na lingia de garejedes sambèn mé cun i atlec talians, ma l ie scialdi positif per duc i y la jadinadèures a pudèi se museré y a purvé elemënc nueves.

Nscila iela unida a s'l dé che per Alyssa y Manuel fòvel ai 30 y 31 de jené tl IceLab de Bergamo – per èi n cësa, davia che i se alenea iló – la prima garejeda.

N sada fòvel da mustré l program curt, che èi à mparà ite sun la mujiga »Thinking out loud« de Ed Sheeran y nce sce i à fat n fal sun l Axel dopel, iesi stai boni de se mèter tla prima posizion.

L di do, n dumënia fòvel da mustré l program lonch, tlo à Alyssa y Manuel balà sun n medley dla mujiga dl film »La bella e la bestia«, i à fat scialdi na bona performance cun elemënc riei y na bela coreografia.



Manuel Piazza y Alyssa C. Montan.

Dut adum à purtà pro che Alyssa y Manuel à giapà 119.82 ponc y à nsci venciù chësta garejeda de jadiné artistich a pères. Segondi ie ruvei Anna Valesi y Filippo Giacomo Clerici (100.25 ponc) y terzi Federica Simioli y Alessandro Zarbo (90.59 ponc).

Chësta ie stata na bela sudesfazion per i doi atlec, ma nce per l team de trainadèures cun Ondrej Hotarek, Luca Demattè y Anna Cappellini.

Mo na pitla curiosità: l guant per l program lonch ie uni fat sun mesura y stichenà ora a man dala stilista de Rovereto Cristina Senter, che ti l à scincà ai doi jèuni per chësta ucajion.

Cun la garejedes per l »Gran Premio Italia« jiràla inant ai 27 y 28 de fauré a Aosta.